

Mid-Day Dogri News Bulletin, 20th April 2025

समे – 12:25

<><><><><>

LG Pak

लेफ्टिनेंट गवर्नर मनोज सिन्हा होरें आखेआ ऐ जे अलगाववाद ते आतंकवाद दा जम्मू-कश्मीर च कोई भविष्य नेई ऐ। कल श्रीनगर च नूर-ए-समां नां दे सूफी सम्मेलन गी संबोधित करने परैन्त पत्रकारें कन्नै गल्लबात करदे होई एलजी होरें आखेआ जे पाकिस्तान गी लोड़चदा ऐ जे ओह् अपने अंदरूनी मामलें बक्खी ध्यान देऐ ते आतंकवादिऐं दी इस बक्खी घुसपैठ करोआना बंद करी देऐ। एलजी होरें पिच्छले किश ब'रें दरान आतंकवादी नेटवर्क ते उ'दे हमदर्द दा समूलचा नास करने लेई सुरक्षाबलें लेई जतनें दी सराहना कीती। नौजवानें गी सोहगे-सतर्क रौहने दी गुजारिश करदे होई एलजी होरें आखेआ जे लोकें गी लोड़चदा ऐ जे ओह् बंडु पुआने आहले तत्वें दी शिनाख्त करियै उनें'गी बक्ख-बाह्रा करी देन तांजे खित्ते च स्थाई शांति ते स्थिरता जकीनी बनाई जाई सकै।

<><><><><>

LG Easter Greetings

लेफ्टिनेंट गवर्नर मनोज सिन्हा होरें लोकें, खासकरियै ईसाई समुदाय दे लोकें गी ईस्टर दि'आ ममारखां दित्तिआं न। अपने संदेस च एलजी होरें आखेआ ऐ जे ईस्टर आह्ला ऐतवार, नमीं मेदें सने बुराई उप्पर अच्छाई दी जित्त ते नफरत उप्पर प्यार दी जित्त गी दर्शादा ऐ। उ'नें आखेआ ऐ जे एह् ध्याड़ा, असें सभनें गी दया भावना, बलिदान, सच्चाई, नेकी ते माफी दी बत्ता पर टुरने दी प्रेरणा दि'दा ऐ। एलजी होरें कामना कीती ऐ जे ईस्टर दा एह् ध्याड़ा हर कुसै दे जीवन च खुशी, रमानदारी ते खुशहाली लेइयै आवै ते एह्दे राहें एकता ते सम्बोध दे जज्बे ते समाजी तंदें गी बी मजबूती थोऐ।

<><><><><>

Service Providers Amarnath

इस ब'रे दी श्री अमरनाथ जी दी जात्तरा दरान शिव भक्तें ताई सेवां स्थूलतां उपलब्ध करोआने आहलें लेई, श्रम विभाग नै पंजीकरण दी प्रक्रिया रम्भ करी दित्ती ऐ। प्रक्रिया गी सखल्ला बनाने आस्तै सहायक श्रम आयुक्त, श्रम सराय डोगरा हाल जम्मू दे दफतरै च इक्क हेल्पडेस्क ते पंजीकरण काउंटर स्थापित कीता गेआ ऐ। सहायक श्रम आयुक्त रूपाली

जसरोटिया होरें सब्भनं पालकी आहलें, पिट्टुएं, टट्टु आहलें ते फेरी आहलें अगगे एह अपील कीती ऐ जे ओह तौलें शा तौले अपना पंजीकरण करोआन। एह प्रक्रिया मुफ्त ते पन्छान दी तसदीक लेई लाजमी ऐ। विभाग नै कुसै दिक्कत-परेशानी थमां बचने ते सालाना जात्तरा गी अमन रमानदारी ते बवस्थित ढंग्गै सिर जकीनी बनाने लेई बेल्ले सिर पंजीकरण करोआने दे महत्त्वै पर जोर पाया ऐ।

<><><><><><>

Earthquake Meeting

आपदा प्रबंधन मैहकमे दे प्रधान सचिव होरें जम्मू दे सिविल सचिवालय च जम्मू कश्मीर च भूंचाल दे खतरे गी घट्ट करने दे मकसद कन्नै इक समीक्षा बैठक दी प्रधानता कीती। बैठक च मुख-मुख इदारें दे माहिर ते बक्ख-बक्ख मैहकमे दे अफसर शामिल होए। मते भूंचाल आले क्षेत्र च होने करियै कुदरती क्रोपिएं कन्नै निबड़ने ताई सांझिएं कोश्टें दी लोड़ पर जोर पाया गेआ। प्रधान सचिव होरें बेहतर योजना, नियमित तौरा पर मॉक ड्रिल यानि क्रोपिएं कन्नै निबड़ने दी रिहर्सल ते कार्रजकर्ताएं दी सिखलाई पर जोर पाया।

<><><><><><>

Yuva Doots

जम्मू दे जिला इंतजामिया नै मिशन यूथ दे तैहत द'उं दिनें दे युवा दूत सिखलाई कार्यक्रम दा कायमाबी कन्नै सरिस्ता कीता। इस पैहलकदमी दा मकसद नौजवानें गी सशक्त बनाना ते समुदायिक भागीदारी गी बढ़ावा देना ऐ। सिखलाई आहले इस कार्यक्रम दरान प्रतिभागिएं गी लोड़चदे कौशल ते ज्ञान कन्नै लैस कीता गेआ तांजे ओह समाज च भलेआं हेठले स्तरै पर बदलाव आहने आहले बनी सकन। सिखलाई हासल एह युवा दूत हून इस मिशन गी अगगे बधाने दा कम्म करडन ते अपने सरबंधत इलाकें च युवाएं गी जागरूक बनाने दी जिम्मेदारी निभाडन।

<><><><><><>

Accident Samba

सांबा जिले च अज्ज बड़डलै होए दे इक दर्दनाक सिड़क हादसे च द'उं जनें दी मौके पर गै मौत होई गई जिसलै के इक व्यक्ति घाऽल बी होई गेआ। एह हादसा उसलै पेश आया जिसलै सांबा जिले च माहेश्वर दे नेड़े अज्ज बड़डलै तकरीबन साड्डे 7 बजे जम्मू-पठानकाट जरनैली सिड़कै पर इक कार दी टक्कर सिड़कै कंड्डे खड़े इक ट्राले कन्नै होई गई। हादसे

दे तुरत मगरा सांबा पुलस मौके पर पुज्जी ते जख्मिं गी जिला अस्पताल पुजाया जित्थे डाक्टरें द'उं जनें गी मोए दा घोशत करी दित्ता। इस सरबंधै च अगड़ी तफ्तीश जारी ऐ।

<><><><><><>

Ramban Highway

भारी बरखें करी पहाड़ी जिले रामबन च बड़ा मता नुक्सान होआ ऐ। जिले च 3 लोकें दे मारे जाने ते केई थाहरें पर सिड़कें, इमारतें ते सार्वजनिक ढांचे गी बड़ा मता नुक्साने दी खबर ऐ। केन्द्री मंत्री डाक्टर जीतेन्द्र सिंह होरें सोशल मीडिया मंच एक्स पर एह जानकारी सांझी करदे होई लिखेआ ऐ जे उ'नें रामबन दे डिप्टी कमिशनर बसीर-उल-हक चौधरी हुंदे कन्नै लगातार संपर्क बनाई रखे दा ऐ। उ'आं उ'नें बेल्ले सिर कार्रवाई करने ते केई बेशकीमती जानें गी बचाने लेई जिला प्रशासन दे जतनें दी सराहना बी कीती। तोआई जम्मू-श्रीनगर राश्ट्री जरनैली सिड़क एनएच-44 गी केई थाहरें पर ल्हास-पस्सियां ते कुप्पड़ पौने करी, गडिडएं दी आओजाई दौने बक्खी दा बंद होई गेदी ऐ। प्रशासन नै जात्तरिं लेई सलाह जारी करदे होई आखेआ ऐ जे ओह एनएच-44 पर उसलै तोहड़ी जात्तरा गी टाली देन जिसलै तोहड़ी मौसम च सुधार नेई होई ज'दा ते सिड़कै गी परतियै सुरक्षित ढंग्गै सिर आओजाई लेई ब्हाल नेई करी दित्ता ज'दा। जात्तरिं गी एह गुजारिश बी कीती गेई ऐ जे ओह जम्मू-कश्मीर ट्रैफिक पुलसा दे अधिकारिक सोशल मीडिया हैंडलें कन्नै जुड़े दे रौहन तांजे उ'नें गी सिड़क दी स्थिति बारै ताजा जानकारीयां कन्नो-कन्नी गै थ्होंदि'आं रौहन।

<><><><><><>